



Las lavurs da construcziun èn prest ventschidas e la piazza survegn ina nova cuvrida.

FOTOS L. DEPLAZES



Las Grischunas ed ils Grischuns da Berna han demussà bler interess per la renovaziun da la piazza federala.

# Plattas grischunas per il plaz avant la chasa federala

Finalmain ina piazza digna avant in edifizis simbolic

DA LUCAS DEPLAZES / ANR

■ Dapi la stad passada èn diversas firmas vidlonder da renovar il plaz avant la chasa federala e cuvri quel cun plattas da gneis da Val S. Pieder. La «Gruppa d'art e cultura» da l'Unìun grischuna da Berna ha laschà infurmar ils responsabels davart las lavurs e l'avertura da la nova piazza. Cun passa 70 participants è l'interess stà remartgabel. Las emprimas plattas da gneis èn gia sin il plaz e fan buna parita. Ma ellas èn anc plazzadas be provisoriain. La tschentada dal crap da fundament è prevista ils 24 da matg. L'avertura uffiziala cun l'absoluziun politica è fixada sin il prim d'avust 2004. Dapi quasi in onn èn las lavurs da transfurmaziun

fitg intensiv, ed ins vesa ussa las novas conturas. Il parcadi avant la chasa federala svanescha per adina e la pli impurtanta piazza da la Svizra avant la chasa federala survegn finalmain ina apparientscha digna da sia funcziun. L'edifizis dal parlament federal e da la regenza è in monument architectonic cun ina gronda valur simbolica. Avant in tal bajetg tutga era ina piazza che sa cumporta cun la muntada e la funcziun da la chasa federala.

## Il crap grischun ès i cun la plima

Ditg e lung èn criticas, propostas ed ideas vegnidas formuladas, examinadas e refusadas. Suenter onns ed onns han ins chattà la storta ed approvà in project che ha persvas ils blers «cuschiniers».

Questa renovaziun prevesa ina simpla cuvrida da la piazza cun plattas, senza monuments e firlanzas. Dal fund cu-chegian or 26 ejecturs che signifitgeschan ils 26 chantuns e lubeschan sco funtauna siglanta divers gieus d'aua ensem cun glischs en colurs. L'emprim è stà seleziunà in granit bernais, chavà or dal tunnel dal Lötschberg. Ma quel n'è betg stà dir avunda. La finala han ils experts chattà il crap grischun, l'enconuschent gneis da Val S. Pieder. Quel saja sis giadas pli ferm che betun e dettia a la piazza federala vairamain in fundament stabil, solid e persistent sco quai ch'i descha. Il crap natiral grischun cun sia structura viva e clera sa cumportia bain cun ils edifizis monumentals vischins (Banca naziunala, Banca chantunala,

Banca Valiant e Café federal) e dettia a la piazza in atgna identitad, han ils experts punctuà.

## Grond interess dals Grischuns

La «Gruppa d'art e cultura» da l'Unìun grischuna da Berna ha envidà ses commembers ad ina visita ed infurmaziun da la nova piazza. E quai è sa mussà sco grond hit. Ricco Bergamin, il president da la gruppa, ha già plaschàir da preschentar als responsabels per la construcziun da la nova piazza ils passa 70 Grischuns e Grischunas. En quatter gruppas han ils visitaders retschavì infurmaziuns d'emprim maun davart il project, las lavurs da construcziun, las scuvertas archeologicas ed ils indrizs da la nova piazza. Dals custs da total 8 mil-

liuns francs surpiglia la confederaziun 2,3 milliuns. La citad da Berna sa partipescha cun var 4 milliuns francs. Las assicuranzas «Mobiliar», domiciliadas a Berna, han fatg in regal da giubileum da 1,7 milliuns francs a la piazza federala.

En l'avegnir na datti nagins plazz da parcar pli. La piazza resta da princip vinda, ella stat dentant a disposiziun per sentupadas, demonstraziuns e manifestaziuns. Ina part è reservada per l'enconuschent martgà da products agrars il mardi e la sonda.

Cun bels maletgs da la cuntrada e da la chava da crappa ha Pius Truffer preschentà sia interpresa da famiglia a Val S. Pieder che ha retschavì l'incarica da furnir las plattas da gneis per embellir la piazza federala.